

**Meeqqat inuusuttuaqqallu angerlarsimaffiup avataanut inissinneqartartut ikilisinniarlugit ilaqutariinnut iluaqutaasumik siusissukkut iliuuseqartarnissamik Naalakkersuisut pilersaarudioqqullugit peqquneqarnissannik Inatsisartut aalajangiiffisassaattut siunnersuut. Pilersaarusiaq juli 2022 naatinnagu Inatsisartunut saqqummiunneqassaaq.**

(Inatsisartuni ilaasortaq Jess Svane, Siumut)

### **Akissuteqaat**

(Meeqqanut, Inuusuttunut Ilaqutariinnullu Naalakkersuisoq)

### **Siullermeerneqarnera**

Aalajangiiffisassatut siunnersuummut nassiunneqartumut Naalakkersuisut qujapput.

Meeqqat atugarliortut Naalakkersuisunit pingaartinneqartorujussuupput. Taamatuttaaq ippoq angajoqqaat ilaqutariillu tamakkerlugit isigissagaanni.

Meeqqat tamarmik pisariaqartitaminnik ikiorneqarnissaannik qulakkeerinnittussaanerput pillugu siunnersuuteqartoq Naalakkersuisut isumaqatigaat. Taamaattoqarnerata aamma pitsaaliuinerit, matumani angajoqqaanut aamma angajoqqaanngortussanut suliniutit ilanngullugit, Naalakkersuisunit pingaartinneqarmata tamatuma kinguneraa. Angajoqqaat tassaasut pingaaruteqartorujussuarmik tassani inissisimasut Naalakkersuisut isumaqarput.

Meeqqat, inuusuttut taakkulu angajoqqaavisa toqqissisimasumik allanngorartuunngitsumillu inuuneqarnissaasa qulakkeernissaannut kommunit aamma suleqataapput pingaaruteqarluinnartut. Taamaammat kommunit suleqatigineqarnerat Naalakkersuisut annertuumik pingaartippaat.

Naalakkersuinikkut sulinermi suliani tamani ilaqutariinnut attuisuni angajoqqaat meeqqallu ukkatarineqarput. Tamanna isumaginninnermiiginnarani, ilinniartitaanermiiginnarani peqqinnissaqarfimmiiginnanngilaq. Tamanna assersuutigalugit ineqarnermut, naligiissitaanermut suliffeqarfeqarfimmilu suliassaqarfinni aamma atuuppoq. Ilaatigut ilaqutariit aningaasaqarnerat Naalakkersuisut isiginiarpaat.

Ilaqutariit aallaavigalugit suliniutit arlallit angajoqqaat sumiginnaanerannik pitsaaliuiffiusut ingerlanneqalereerput. Meeqqat inuusuttullu angerlarsimaffiup avataanut inissinneqartarnerisa pitsaaliorneqarnerannut atatillugu suliniutit taakku iliuuserisanut ikorfartuutaasinnaapput.

*Kalaallit Nunaanni meeqqanut inuusuttunullu atugarliortunut kalaallit qallunaallu oqartussaasoqarfisa assigiinngitsunik suliallit akornanni suleqatigiinnermi 2020-2023-mi suliniutit arlallit pitsaaliuinerusut aamma nassaassaapput. Suliniutit kommunit suleqatigalugit suliarineqarput, aamma suliniutit atortuulersinneqarneranni kommunit ingerlaavartumik ilaatinneqartarput.*

Assersuutitut erseqqissarneqassaaq pitsaaliuinermik suliniut MANU, taannalu kalaallit qallunaallu suleqatigiinnerannit tapersorsorneqarpoq. Angajoqqaat atugarliortut isumalluuteqarpiannngitsullu kiisalu angajoqqaat iluaqutaalluurtumik meeqqanut mikisunut

siunnersorteqartitsinermik ilusilerlugu tapersorneqarnerat MANU-mi nutaami qitiutinneqarpoq.

Angajoqqaajunerup patajaallisaavigineqarnissaanut allanngorartuunngitsumillu ilaqutariittut inuuneqarnissamut suliniut peqataassaaq taamaalillunilu angerlarsimaffiup avataanut inissiisarneq pitsaaliussallugu. Meeqqat sumiginneqartarnerat pitsaaliorniarlugu angajoqqaajunerup Naalakkersuisunit ukkatarineqarnera suliniutip taassuma ikorfartorjaa.

Tamatuma saniatigut ilaatigut kommunini sulianik suliarinnittartut, peqqissaasut ernisussiortullu kiisalu ulluunerani paaqqinniffinni sulisut akornanni oqartussaasoqarfiit assigiinngitsunik suliallit suleqatigiinnerinik patajaallisaaneq aqqutigalugu ajornartorsiuteqartut siusissukkut paasineqartarnissaat Naalakkersuisut sulissutigaa. Taamatuttaaq ajornartorsiuteqartut siusissukkut paasinerisigut, angajoqqaatut piginnaasassat siusissukkut patajaallisaavigineqarsinnaapput. Tamatuma peqatigisaanik ilaqutariinnut sullissiviit katsorsartinnissanut neqeroorutaat assigiimmik ingerlanneqalissapput meeqqanullu atugarliortunut taakkulu angajoqqaavinut sammitinneqassallutik, taamaalillutik pisariaqartinneqartumik ikiorneqarnissaq piniassammassuk.

Suliniutitik aallartinneqareersunik pitsaaliuineramik angajoqqaajunerullu patajaallisarneqarnissaanik ukkassisunik assersuutissaqarpoq arlalinnik. Pitsaaliuineramik suliniutit taakku piffissaq ungasinnerusoq isigalugu inissiisarnerit ikilisinneqarnissaanut tapertaassapput.

Meeqqat illersuisuat aamma inassuteqaateqarpoq, inassuteqaataalu pitsaaliuineramik suliniutini ilanngunneqarput.

Meeqqat inuusuttullu angerlarsimaffiup avataanut inissinneqartarnerat pillugu suliassaqarfimmi iliuseqarnissap qulakkeerneqarnissaa taamaattoq pingaaruteqartorujussuuvoq. Suliniutit maanna ingerlanneqalereersut assigiissarneqarnissaat angerlarsimaffiullu avataanut inissiisarnermik ukkatarinninnissaat pingaaruteqarpoq. Iliuseqartoqarnera pingaaruteqarpoq.

Taamaammat allannguutissatut siunnersuut tulliuuttoq Naalakkersuisut innersuussutigaa:

Meeqqat inuusuttullu angerlarsimaffiup avataanut inissinneqartartut ikilisinneqarnissaat siunertaralugu UKA 2022-mut ilaqutariinni pitsaaliuineramik suliaqarneq pillugu iliussissanut pilersaarummik suliaqarnissamik Naalakkersuisut peqquneqarput.